

VOLKSVREEMD

- Margie Viljoen-

Kontakbesonderhede vir opvoerregte:
Magdaleen van Zyl (e-pos: mail98142@telkomsa.net)

POFADDER SE SKOOLRAAD IS IN SITTING. DIE DRIE-MAN SKOOLTJIE SE EEN JUFFROU HET OORNAG DIE PAD GEVAT OM SKIELIK TE GAAN TROU EN NOU IS DAAR 'N NOODVERGADERING OM 'N NUWE JUFFROU TE KRY, AANGESIEN OU JUF MOLLER NIE AL VYFTIG DIE KINDERS VANAF GRAAD 1 TOT 6 KAN HANTEER NIE - DIE SKOOLHOOF NEEM NET GRAAD 7, AANGESIEN HY BAIE ANDER VERPLIGTINGE HET

DS SCHOONRAAD (Voorsitter van die skoolraad)

MNR DU TOIT (Skoolhoof)

SUSARAH PETOORS (ryk boer van die omgewing, wat op skoolraad dien, se vrou)
MeV DS SCHOONRAAD (ds se vrou)

JUF MOLLER (onderwyseres)

5 VILJOEN SUSSIES

MISS LE GRANGE

STEL: tafel, stoele

BY DIE TAFEL SIT MNR DU TOIT, DS SCHOONRAAD en MEV PETOORS
LG IS DRESSED TO KILL , EN MET JUWELE BEHANG, ASOOK REDELIK
ERG GEGRIMEER.

MEV PETOORS: Ek eis om te weet wat hier aangaan. Dit is my en Boet se goeie reg om insae te hê in elke besluit en elke klein dingetjie wat die skool aangaan.
Aangesien Boet nou die trust.....

MNR DU TOIT: (hande in die hare - moedeloos en gespanne) Susarah, dis nou regtig nie die tyd om oor geld of sulke goed te praat nie - ons het regtig 'n krisis op hande en....

MEV PETOORS: Dis mev Pretorius want ons is formeel in sitting, en....

MNR DU TOIT: Ag, asseblief Susarah - en ek wil in elk geval nog heeltyd weet wat jy hier maak en waar is Boet, aangesien dit in elk geval hy is wat op die skoolraad dien en nie jy nie, is ek nou in totale onbegrip oor die hele situasie. Hier is 'n krisis!

MEV PETOORS: Jy weet goed Boet dien op elke raad en bestuur , en dit is vandag die wol-vereniging se raadsvergadering en Boet is darem die Voorsitter, en daarom is ek gekoöpteer om te kom insit in die skoolvergadering. Ons besef daar is 'n krisis op hande en ek is hier in raadgewende hoedanigheid, en natuurlik om die trust, asook ons famillie-naam te verdedig en te verteenwoordig.

MNR DU TOIT: ag, hemel tog - wat se trust-trust is dit tog met jou? Net omdat Boet met die vorige kermis 'n slagskaap geskenk het, en daar 'n beurs in sy naam bestaan, maak nou wraggies nie vir hom, of dan nou vir jou die kop van die saak nie. As ek my sin kan kry dan sal.....

DS SCHOONRAAD: Broer, Suster. Kom laat ons rustig raak. Ek het begrip vir die spanningsdraad wat hoog loop, maar in krisistye moet ons hande neem, en as verenigde front voorstap in die linies teen verraad en verderf. Ons moet die volksskatte beskerm teen aanslae van die duiwel en die engelse. Ons moet ons voorgeslagte eer en dit wat ons na aan die hart lê, bewaar en koester vir die nageslagte.

MNR DU TOIT: uhmmmm , ja, dominee, dit is als waar wat dominee nou daar sê, maar hierdie is 'n krisis. Ons kan later weer bewaar, nou is dit net krisisbestuur.

MEV PETOORS: maar dit is waar wat dominee sê - in ons tyd van krisis, moet ons ook met ons ingebore waardestelsel en norme die trauma hanteer en met ons geskiedenis in gedagte, 'n nuwe benoeming maak.

MNR DU TOIT: Dit is nie 'n kwessie van 'n nuwe benoeming maak nie - die departement het geen onderwysers of onderwyseresse beskikbaar nie, slegs die een wat hulle op so 'n kort kennisgewing in die hande kon kry. Ene juffrou Le Grange.

DS SCHOONRAAD: Le Grange - ons geskiedenis is deurspek met die van. Edel voorwaar . Ons kan net dankbaar wees dat sy uitgespaar was om binne 24 uur te kan kom.

MEV PETOORS: Ek wonder dan nou weer hoekom sy so danig beskikbaar is. Is sy sieklik of werkloos, of hoekom is sy dan nie tans in diens van die departement nie. Nee, ek wil dadelik weet hoekom sy so vinnig beskikbaar is. Dit is my goeie reg.

DS SCHOONRAAD: Rustig suster. Maar ek stem saam - dit is ons , as skoolraad, en dan natuurlik my , as voorsitter, se heilige plig, asook ons reg om te weet wat die ware toedrag van sake is. Met alle respek gesê, die departement moet tog nie vir een oomblik dink dat ons met 'n minderwaardige produk tevrede sal wees nie. Ons het d dieselfde regte as enige groot stadsskool. Ek bevestig weer dat ons ons moedertaal en

geskiedenis en erfenis moet koester en slegs die beste vir ons jeug moet bied.

MEV PETOORS: dis wat ek ook mos sê. Die juffrou Le Grange moet eers kom vir 'n onderhoud. Geen kort rokkies en stadsgewoontes om ons jeug en ons mans in die verderf in te lei nie. En ek word weer gekoöpteer vir die onderhoud, want daar moet 'n toonaangewende dame by wees om haar kleredrag deeglik te beskou.

DS SCHOONRAAD; Wat 'n goeie idee, mev Petoors...

Mev PETOORS: Pretorius!

DS SCHOONRAAD : Nou ja, soos ek besig was om te sê, dit is 'n uitstekende idee, en dan kan ons vir mamma ook koöpteer, want as moeder van die kudde is sy mos darem die toonbeeld van kuisheid asook so heldersiende om die ware karakter van mense te ontleed.

MEV PETOORS: Dominee! Ek voel werklik nou ligweg in die gesig gevat, en dan is dit nou mos ook nie nodig om mevrouw lastig te val nie, want sy is alreeds so ongelooflik bedrywig en besig om aan u sy te beweeg. Ek word darem alom beskou as 'n bekwame en edel vrou met fyn smaak.

DS SCHOONRAAD: Ag suster, nee, my bedoelinge is absoluut eerbaar en bo verdenking. Dis alreeds omdat u so toonaangewend en ongelooflik bedrywig is, dat ek gedink het mamma maar moet kom insit in die verrigtinge. Sy is reeds gewoond om my regterhand te wees.

‘ n KLOPPIE AAN DIE DEUR , EN TERSELDERTYD KOM MEV DOMINEE MET ‘N VINNIGE STAPPIE BINNE.

MEV DOMINEE (uitasem) Hier is ek. Ek het gekom, so gou ek gehoor het van die krisis. Goeiedag almal. (gaan sit en haal pen en boekie uit) pappa, ek is gereed vir die krisis - waarmee kan ek jou vandag weer bystaan.

DOMINEE BUIG LIGWEG OOR EN DRUK MEVROU SE HAND

MNR DU TOIT: Dag, mevrouw (staan so halfhartig uit sy stoel uit op) Dit was nou regtig nie nodig dat u u verpligte los om hierheen te kom nie, want dit is mos nou ook 'n skoolraadsvergadering, nouwel 'n noodvergadering, maar dit is mos nou eintlik net vir skoolraadslede en u sien, wat ek nou eintlik probeer sê.....

MEV PETOORS: (uit die hoogte) Dag mevrouw. Wat mnr du toit nou eintlik probeer sê en nie kan uitkry nie, is dat dit 'n hoogsvertroulike noodvergadering is, en dat ons groepie nou dadelik en indringend moet sit oor 'n uiters ernstige en dringende aspek wat ons jeug se opvoeding raak.

MEV DOMINEE: Dagsê hartjie. Nou ja, dan is ek mos nou gereed. Ek besef die erns maar al te duidelik , en toe ek nou by die poskantoor hoor dat jy ook hier by 'n skoolraadsvergadering is, mev PETOORS, het ek besef, daar is groot nood, want jy is mos tog nie op die skoolraad nie, en daarom het ek vir Salomie gesê dat sy die kinderkrans vandag sommer almal saam moet laat sing - dis nooit te vroeg om met kersliedere te begin nie. En hier is ek om saam met die herder van die kudde, die verlore skaap te help soek.

MEV PETOORS: Ek wil nou regtig nie ongepoets klink nie mevrouw, maar dit is ietwat ongehoord. Die spreekwoord sê immers skoenmaker hou jou by jou lees, en in elke geval is ek gekoöpteer want Boet dien mos in soveel rade, dat hy my nou al moet koöpteer as daar 'n dubbele vergadering is.

MNR DU TOIT: Eintlik moet net ek, as skoolhoof, en dominee as Voorsittter van die skoolraad, en ou Boet Petoors vergader.

‘n VINNIGE TOK AAN DIE DEUR EN DAAR STAAN DIE 5 VILJOEN SUSSIES

Nr 1, 2 en 5 gelyk: middag antie, middag mevrou, middag dominee , middag meneer - meneer,meneer, meneer moet gou kom

MENEER DU TOIT: Ja, toe julle, wat is fout? En hoekom is julle nie in die skool nie?

(die kinders stamp aan mekaar)

Nr 3: Meneer sien, dit saak staan nou eintlik so - (stamp aan nr 4) toe sê jy

Nr 4: Dag antie, dag, mevrou, dag dominee,dag meneer

MEV PETOORS: Nou wat is dit dan tog weer met die Viljoentjies vandag dat hulle nie kan praat nie. Julle het nou mos al hoeveel keer gegroet - en vir wat staan julle nie stil nie.

Nr 3 : Dag antie. Nee , ons groet maar antie. Ma sê altyd goeie maniere kos niks nie, antie en ons moet altyd vriendelik wees oral waar ons gaan antie.

(al vyf knik instemmend)

Nr 5: Ja, antie, ma sê mens kan arm wees, ma tog nettie arm van gees nie , antie. En aan die kindertjies behoort die.....uhmmmmm, die.....ek kan nou nie meer verder onthou nie, antie

(mev dominee maak kloek geluidjies) Ag foeitog pappa - ons moet weer gaan besoek aflê

MEV PETOORS: En julle noem my mevrou Pretorius, hoor

Al 5: Ja , antie, nee dis reg so antie

(mev petoors wil haar nog vererg)

MNR DU TOIT: Nou toe julle, kom nou uit met die storie wat dan nou so dringend is dat al vyf gelyk uit die skool uit moet wees.

Nr 1: meneer moet kom

Nr 2 ja , meneer moet kom

Nr 5. Ja, en as meneer kom , moet dit met rasse skrede wees., en meneer nie langsaam haas nie (baie ingenome met haarself dat sy so 'n uitdrukking kon onthou)

MEV DOMINEE: Pappie.....

DOMINEE SCHOONRAAD: uuhmm ja. Nou toe , kleingoed, kom praat nou maar dat ons die krisis kan verstaan. Een op 'n slag. Dominee kan nou nie julle name so goed onthou nie, maar kom ons begin nou sommer hier van links na regs dat ons nou duidelikheid kan kry oor wat die probleem is. Toe dogter, praat maar.

Nr 1. Oom

Nr 2,3,4 en 5: dis dominee

Nr 1: ag, ek bedoel dominee - dis juffrou Moller

Nr 2: ja, dominee, die storie gaan eintlik oor juffrou Moller

Nr 3: dominee, dominee juffrou sit by haar tafel en haar hare is nie eens netjies soos altyd nie.

Nr 4; ja, dominee, en sy huil al haar sakdoeke nat.:

Nr 5. Daar is al amper 'n plas rondom haar, oom

(almal knik instemmend)

Nr 1: en dan is die storie nog oor die kinders ook, dominee

Nr 2: ja, dominee, dis oor die kinders lat juffrou se sakdoeke so nat is.

Nr 5. Die kinders laat vir juf Mollie teen die mure uitklim

Nr 3: en sy praat so deur haar lippe

Nr 4: ja, ek kon nie hoor nie, toe gaan staan ek agter haar, en sy't nie eens vir my gesien nie, en sy se net : ek kan nie meer nie, ek kan nie meer nie

Nr 5. En sy's by die einde van haar kragte en waar sal haar hulp vandaan kom, oom

Nr 12 en 5: en toe kom roep ons vir meneer, meneer

Nr 3 en 4: ja, want juffrou Moller kan dit nie meer vat nie, meneer

DOMINEE SCHOONRAAD: MnR Du Toit, ek as skoolraad-Voorsitter voel nou effens mislei, aangesien ek sterk onder die indruk was dat u , terwyl die raad in sitting is, ‘n plaasvervanger vir u klassie sou kry, aangesien juffrou Moller dit reeds druk het met al die ander kinders. Hoe verstaan ‘n mens die Viljoentjies dan nou?

MNR DU TOIT: uuhhmmm Nee, dominee het reg verstaan. Ag, ek bedoel nou nie vir die Viljoentjies nie, dominee het vir my reg verstaan. Ek het vir Sussie gevra of sy dan tog nie net vir die voormiddag daar sal instaan nie, maar Sussie moes nou sekerlik ‘n ander krisis érens gekry het dat sy nie op haar pos is nie. Ek kan dit nou eintlik ook nie verklaar nie, maar ek gaan nou sommer dadelik vasstel as almal my net ‘n wyle verskoon en dan sorg ek sommer dat die Viljoentjies ook op hul plek is.

(MNR DU TOIT stap dan na ook sommer dadelik deur toe, vat die Viljoentjies aandie hand en loop uit)

MEV DOMINEE: pappa, jy sal moet ingryp. Daar is vir my ‘n losbandige teenwoordigheid wat moet aangespreek word.

MEV PETOORS: Mevrou moet miskien meer reguit praat, en sê van wie mevrou nou praat. Is dit nou van die Viljoentjies, of dalk.....van iemand anders.

MEV DOMINEE: pappa!

(dominee staan op om te praat, en dan is daar ‘n klop aan die deur)

DOMINEE: Binne!

(miss Le Grange stap binne. Sy’t heelwat bagasie)

Miss Le Grange: Oh, goodday everybody. I came as quickly as I could, but I could not forsene the absolute terrible road and the strange animals that gather round the edge of the road.

(stap na dominee en steek haar hand uit) Miss Le Grange, nice to meet you
(sy doen dieselfde met die ander twee. Almal gaap haar net aan)

MISS LE GRANGE: (draai na dominee toe) I presume that you are mister Du Toit, the headmaster. Thank you for the opportunity, mister Du Toit. So nice of you. I had a private tutoring job, but the family moved to Australia, so I was between jobs, so to say, when the department called me , and hear I am.

(almal staan nog half oopmond - Miss Le Grange gaan sit) oh, please do sit down.
The department told me that your'e not very formal here, so, please.

So, tell me, mister Du Toit, how many children will I be teaching, and what subjects, and I must say, tea will be nice and after I've just freshen up, I will be glad to go the the school . I mean to say, it is an emergency after-all.

MEV DOMINEE: oo aarde , pappie, jy sal die kerkraad byeen moet kry vir ‘n noodvergadering, want die skoolraad is nou nie genoeg om hierdie volksvreemde gedoentetjie aan te vat nie. En wat praat sy nie als nie - ek het dan gedink julle sê dit is ‘n juffrou le Grange

DOMINEE SCHOONRAAD: Maar, mamma, dit was tog duidelik - juffrou Le Grange. Ek sal mos nooit as te nimmer ons milieu besoedel met ‘n uitlander wat die vloek van die britte inbring in ons geliefde dorpie nie. Dis sekerlik maar iemand van die department wat kom kyk hoe dit hier gaan - hulle wil mens mos altyd graag onverhoeds betrap, asof ons nou ooit sal oortree. (skud die kop)

MISS LE GRANGE: I didn't quite follow, but I think I heard my name, but you pronounced it wrongly - its Le GRAnge

MEV PETOORS: (lag) oooooo, erens is daar ‘n reuse slang in die gras. Sy dink

dominee is mnr du toit. En dan klink dit dan nou hoeka ook of die juffrou ‘n stoere boere rooinek is wat nie kan boe of ba in Afrikaans sê nie

MEV DOMINEE: mev Petoors, gedra jou soos ‘n vrou van jou jare. Daar is werklik niks komies in die situasie nie. Soos ek dit sien is die juffrouw werklik uiters kortsgigtig en nou werklik ook nie vreeslik intelligent nie, anders sou sy tog dadelik opgemerk het dat dominee die herder van die kudde is. Nee, wat, die jeug van vandag is ook nie al te taktvol nie. Al kom sy nou dalk van die minister self.

MEV PETOORS: (lag) en hoe moet sy nou dit weet. Onthou , die kind is brits, en ‘n engelse dominee of priester lyk dalk anders. (staan nou op en steek haar hand uit vir juffrou Le Grange) Dagsê juffrouw. Ek is Mev Pretorius, raadslid Pretorius se vrou, en toonaangewende voorste vrou wat betref die nuutste modes en giere.

MISS LE GRANGE: oh, how nice to meet you mevrouw Pretoria, and I’m sorry I didn’t quite get that - what was it about modes and gears? I actually came by bus, because my Toyota is in for a major service.

MEV DoMINEE: Pappie, wat praat sy van ‘n outa - o, liewe aarde, ons sit nou-nou nog met ‘n politieke storie ook wat in die koerante gaan draai. Ons praat mos darem lankal nie meer so nie.

DOMINEE SCHOONRAAD: Ek het vandag nou die intense begeerte dat Arnoldes Pannesvis of C.J. Langenhoven deel van die skoolraad kon uitmaak , want hulle sou dadelik korte mette kon maak van enige indringer wat ons taal en dorpie wou binne-ring. En hoe kan Le Grange nou verander in iets onuitspreekbaars, wat van buite nie heeltemal onaansienlik is nie, maar van binne verrot is met die taal van die duivel self.

MEV DOMINEE: Pappa! Dat ek hierdie dag moet beleef dat jou oë dwaal en dit na ‘n duiwelse jesebel! Verskoon my - ek moes nie die kinderkrans in salomie se hande gelaat het nie. Iemand moet seker beheer neem

(mev spring op, vat haar handsak en storm uit)

(dominee sit met sy hand op sy bors, heel sprakeloos - en storm dan agterna

DOMINEE: Mammaaaaaaa!

MISS LE GRANGE: I sense a terrible vibe. Did something happen? Was there an accident or is someone very ill? If someone can just point me to the school, I’m sure I will be fine, and then you can handle your crisis.

MEV PETOORS: Ek volg nou nie heeltemal nie , hartjie, maar ek is darem verder geleerd as die ander, so ek verstaan jy sê iets van ‘n krisis. Nee, kind, jy verstaan dalk nou nie heeltemal so goed nie. Jy sien, jy is eintlik die krisis Kyk , ons mense is mos maar nou stoere boere en praat net ons taal. Verdra geen uitlander nie - ou Jenkelsohn by die boonste winkel tel nie, want die ou Jood praat mos Afrikaans amper beter as enige een van ons.

En nou’t ons mos die nood by die skool, met die dat daai loskop Van Zyl-juffrouw mos oornag verdwyn het om te loop trou - seker hoeka in die ander tyd, maar die sal mens mos nou eers oor ‘n paar maande kan uitvind - en toe soek ons mos nou so dringend ‘n nuwe juffrou wat dadelik moet inval, want die eksamen is op hande, en nou ja, toe kom jy nou. Jy verstaan darem seker die storie. You is de problem. You verstands?

MISS LE GRANGE: How can I be the problem? I don’t even know anybody and why were those two people so upset? It couldn’t be with me , because I just got here. Verstands? First hands what? Must I first wash my hands? That’s what I asked you, if I can freshen up so that we can go to the school, I will be glad.

(mnr Du Toit kom in met 'n huilende juf Moller)

JUF MOLLER: ag meneer du toit. Jy moet verstaan. Ek is mos nou ook nie meer vandag se kind nie. En al die spanning, en dan nog die vyf Viljoentjies wat , as hulle nie heeltyd in hulle neuse krap nie, los hulle die onsmaaklikste winde - wonder so wat hulle eet, seker baie kool. Foeitog. Ag, ek is so jammer, meneer

MNR DU TOIT: Toenoumaar, Juffrou Moller. Als sal weer regkom. Ons vra vir mevrou om vir jou bietjie lewensessens of iets dergeliks te gee om te drink, en kort voor lank is juffrou weer ons staatmaker.

(mnr du toit kyk rond) nou waar op die aarde is dominee en mevrou dan nou heen. En wat se vreemde meisiekind sit dan nou hier? Dit is voorwaar vandag 'n eienaardige dag, met eienaardige dinge.

JUFFROU MOLLER: ag, aardetjie tog! Dis als my skuld. Sweerlik het die departement nou iemand gestuur om te kom kyk wat hier aangaan. Ag, meneer Du Toit, vergewe my tog asseblief. Praat tog met die juffrouw van die departement dat hulle my tog nie op vroeë pensioen stuur nie. Ag, meneer, ek smeek jou - die ou kindertjies is tog al wat ek het.

(juffrou Moller snik nou weer)

MNR DU TOIT: toe-toe, juffrou Moller . Dit is sekerlik nie so erg nie. Ek , as skoolhoof is mos nou verantwoordelik vir die omstandighede, en sal mos aan die departement verduidelik. Juffrou sit nou dadelik hier, en mev Petoors kan vir juffrou , en sommer vir die juffrouw van die departement ook, 'n lekker koppie tee gaan maak, en dan sal ek sommer gou-gou hierdie nuwe krisis die hoof bied.

Nou waar is dominee en mevrou dan nou heen? Vandag is voorwaar 'n ander soort dag.

(mev petoors probeer heeltyd mnr du toit se aandag trek terwyl hy praat)

Mnr du Toit draai na Miss Le Grange toe en steek sy hand uit)

MNR DU TOIT: Mnr Du Toit - ek's die skoolhoof. Bly te kenne. Dit was regtig nie nodig om self te kom kyk na ons krisis nie - ek het mos nou vir u laat weet , as u net vir ons 'n plaasvervanger kan stuur, al is dit ook net tydelik, sal dit wonderlik wees en regtig al ons probleme oplos.

MISS LE GRANGE: oh, are you mr Du Toit? Are there two mister du toit's then or where did the mix-up happen? Are you the headmaster then, or is the other mr Du toit the headmaster? Oh, it actually doesn't matter - I'm Miss Le Grange, the Department sent me to solve your crisis.

MEV PETOORS: Nou't ek als gehoor. Juffrou Moller se tranen droog ook al amper sommer op. Mnr Du Toit, dit is juffrou Le Grange, of eintlik sê sy sy is Miss Le Grange. Dominee en mevrou het sommer die pad gevat - om nou die eerlike waarheid te vertel: dominee het die kluts kwytgeraak oor die aansienlike juffrou Le Grange en toe vervlies mevrou haar - die man is mos nou ook darem van vlees en bloed, al is hy die herder van die kudde, en toe storm altwee hier uit.

MNR DU TOIT: Maar ek verstaan nie - wie is juffrou Le Grange dan nou presies?

MEV PETOORS: Sy 's die plaasvervanger vir juffrou van zyl, nie iemand van die departement nie. Dis wat ek nog heeltyd probeer sê

(juffrou Moller begin weer te huil)

MNR DU TOIT: Aag nee, juffrou, wat is dit dan tog nou weer?

JUF MOLLER: Ek ken mos nou nie huis engels nie. Ag, my liewe meneer Du Toit, wat gaan tog van my word? Hoe gaan ek en die engelse juffrou dan tog ooit 'n woord

praat? Ag aardetjie tog - sy lyk so bekwaam - miskien is sy so bekwaam dat sy sommer my werk ook kry! (huil harder)

MISS LE GRANGE: Why is she crying? Why is everybody either crying, or mad at someone or leaving the building ? What on earth is going on? This is a madhouse! I was sent by the department to fulfill a task as teacher, not a councillor! I don't understand a thing, and nobody understands me! Good day!

(miss le grange vat haar tasse en loop)

(die volgend oomblik staan die Viljoentjies in die deur)

Al 4: middag, meneer, middag antie, middag juffrou Mollie

Nr 1 meneer, meneer moet liewerster kom help, meneer

Nr 2 ja, meneer, en miskien moet meneer liewer nie vir juffrou Mollie saambring nie meneer

Nr 3 en 5 Meneer moet nou assebliefstog als los en kom meneer, want êrens is 'n skroef los, meneer

MENEER DU TOIT: Wat is dit dan tog vandag met julle? Kan mens nie vir julle 'n oomblik alleen los nie? Julle is mos nou nie pieklein nie, en julle het mos werk om mee aan te gaan - hier is regtig 'n krisis!

Nr 3: Jammer meneer, nee dis reg meneer, ons kan alleen gelos word meneer

Nr 4: Ja, meneer, ons kan alleen gelos word meneer,

Nr 1en 2 Ja, meneer, en ons het al die werk gedoen wat juffrou Mollie gesê het ook meneer

Nr 5: Ja, meneer,meneer kan maar ons werk kom kyk, meneer. Dis eksie-perfeksie meneer

MNR DU TOIT: Nou praat dan tog asseblief - en hou op krap in julle neuse en staan tog in hemelsnaam net stil.

Nr 1: Jammer meneer - ons staan nou stil meneer

Nr 2: Staan stil, julle

Nr 3: Meneer, meneer, daar is 'n krisis by die skool meneer

Nr 4: Maar dis regtig 'n ongeluk meneer, nie net 'n krisis nie, dit is 'n ongeluk meneer

Nr 5: En dit was nie ons skuld dat dit 'n ongeluk was nie, meneer - dit was net vanself 'n ongeluk, meneer

MEV PETOOR: Partykeer kan ek hierdie orrelpyp-gebroedseltjies sommer 'n hou of twee gee - PRAAT!

(juffrou Moller huil, mev petoors lyk dreigend, mnr lyk moedeloos en die Viljoentjies klou mekaar bedremmeli vas)

Al 4: Die skool het aan die brand geraak!

Nr 1: Perongeluk!

Nr 2 Heeltemal perongeluk!

Nr 5: Ons sal nie so 'n ongeluk kan uitdink nie meneer

Al 5: Dit was nie ons nie meneer, rôrig meneer

JUF MOLLER HUIL AL HOE HARDER

JuF MOLLER: Ag, dis als my skuld. Ek moes nooit self gekom het en die kinders alleen gelos het nie. Dis seker van al die gasse wat so ophoop in die klaskamers, dat daar nou 'n ontbranding plaasgevind het. Ag, die arme kindertjies. Die arme skool. Nou't niemand meer 'n werk nie. Ooooo, wat gaan tog van ons almal word.

(DIE VILJOENTJIES HUIL NOU OOK ALMAL. Mevrou Dominee kom in getrippel met ds druipstert agterna)

DOMINEE: mamma, dis krisistye , mammie.....ons moet nou saamstaan, handevat, en saam-saam die wa deur die drif kry. Asseblief my ou duifie.

MEV. Van drifte gepraat, waar is die geagte uitlandse juffrou le grange, of wat haar van ook al is.

MEV PETOORS: Ek wil nou nie uit my beurt uitpraat nie, maar dis hoekom dit eintlik 'n geslote vergadering was, en as dit nou maar net so geslote gebly het, dan het niks van al hierdie rampspoedighede ooit gebeur nie, en kon mevrou nou vredevol kinderkrans gehou het, maar nou ja, gedane sake het mos nie brieke nie, en nou sit ons met niks, nie eens 'n skool nie. Nee , sy's mos weg toe als so deurmekaar raak. Julle storm dan een na die ander hier uit.

MeVROU: Pappa, neem beheer. Jy's immers die voorsitter

MENEER DU TOIT: Ag dominee, voor u nou praat moet u my verskoon dat ek nou gaan praat. Ek stem nou sowaar saam met mev Petoors, al is sy nou net gekoôpteer of wat sy dit ook al noem. Hier is nou 'n groot tranedal (die viljoentjies en juf Moller huil sommer hard, mev ds sit ook al met 'n snesie en snuif) en dit eintlik nou heeltemal onnodig. Ons het 'n puik skooltjie , en ek en juf Mollie gaan regtig goed aan daar, en ek stel voor dat ons die departement en uitlanders en flerries en wat ook al heeltemal uitlos, en vir Sussie vra - sy was 'n onderwyseres voor haar troue, ons almal ken haar en ons almal is tevrede. Hoe klink dit?

DOMINEE: Nou ja, broer, dit blyk dan nou amper te wees of jy dalk 'n voorsitter van 'n vergadering kan wees instede van 'n skoolhoof.....

MEV DOMINEE: Pappie.....darem nou nie so nie.....Jy bly immers die herder van die kudde en dus die voorsitter van die raad

MEV PETOORS: ja, miskien moet ons sommer 'n nuwe skoolraad ook verkies, as ons 'n nuwe juffrou aanstel. Met my en Boet wat voorvat, kan dinge net goed verloop. Ek het hoeka aan Sussie gedink voor julle nou met die uitlander hier aan gekom het.

DIE STORIE EINDIG IN :N BABELSE VERWARRING< , MET ALMAL WAT HALF GELYK WIL PRAAT:

MEV DOMINEE: pappa.....nou moet jy ferm staan en die leisels vastrek.....

MEV. PETOORS: as volwaardige lid, hoef ek dan nie net as gekoôpteerde te praat nie.....

JUF MOLLIE: Beteken dit dat ek nou maar kan terug gaan klas toe.....die stomme ou kindertjies..... as gaan weer reg wees.....

VILJOENTJIES: Dankie meneer, dankie antie, dankie mevrou, dankie juf Mollie, dankie dominee, dankie vir als, en ons het maar net gespeel van die brand meneer, dit was sommer ou herklaas wat 'n dampie gemaak het meneer , sorry meneer

MNR DU TOIT: ek dink ek kort 'n vakansie!!!

